

辨

證

錄

辨證錄卷之七

山陰陳士鏗敬之甫號遠公父號朱華子著述

會稽陶式玉尚書號存齋又號

叅訂

痙痙門

一感溼熱之氣忽又傷風口噤不能言項背幾幾脚手攣
急角弓反張人以爲太陽之傷寒也誰知是太陽之痙
病乎夫痙病亦有三陽三陰之殊亦能傳經與傷寒之
症無異但傷寒單傷於風而痙病則合溼熱而成之也
似乎治傷寒可單治風而無難痙病宜治一而不

易也誰知邪之所湊其氣必虛一邪相

氣之

虧况三邪之同犯乎補正以祛邪治瘕無難速愈或謂
一邪相犯尙須祛邪爲先三邪並犯則邪氣彌漫非用
祛邪之藥安能濟哉不知一邪之犯其力專衆邪之犯
其勢散力專者宜攻勢散者可補於補之中而行其攻
之法何不濟之有無如其症同於傷寒不可驟用補也
所以殺人苟知可補之法分症以治之實易易也如此
症見太陽之徵不可徑治太陽之邪宜補太陽之正太
陽之正氣旺而風溼熱之邪不必攻而自散矣方用五

苓散加減治之白朮一兩茯苓一兩澤瀉三錢猪苓一錢羌活五分桂枝三分水煎服一劑而角弓反張之疾定二劑而口不噤脚手不攣急也三劑諸症盡痊五苓散專利膀胱之水三邪之中至難去者溼耳先利其溼則火隨水泄而風邪無黨矣故少用羌活桂枝以祛風則風自易解况五苓散亦非單利濕之藥也其白朮茯苓原能健脾生胃今多加爲君則補重而利輕所以能建功之速尙少少用之則攻多於補反無益矣

此症用桂苓薏羌湯亦效

茯苓一兩羌活二錢薏仁一兩桂枝三分

服

一感溼熱之氣又感風邪頸項強直一目左右手足
搖擗人以爲少陽之傷寒也誰知是少陽之瘕病乎夫
少陽居於半表半裏之間其勢將欲入肝也而尚留於
陽明故三邪同感目所以左右視亦現證於二者之間
耳手足搖擗者風性動而溼性靜兩相違背風欲動而
溼挽之溼欲靜而風激之熱邪又從中沖擊此搖擗之
所以起也搖擗不已又風引而上行於是頸項不利而
溼氣留中遂至強直不搖矣治法必須和少陽之正氣
少用散邪之品易於解紛也方用小柴胡加減治之柴

胡二錢白芍五錢當歸三錢茯苓五錢黃芩一錢甘草
一錢水煎服一劑病減再劑病全愈小柴胡湯和少陽
之聖藥也今又加入白芍當歸以補其肝中之氣使肝
旺而邪不敢遁於肝加茯苓五錢以健胃而利溼則邪
不敢回於胃茯苓且同柴胡以祛風熱引之而共入於
膀胱尤易下走此又法之至神者也

此症用龍車
散亦效

柴胡甘草各一錢白芍茯苓各五錢
車前子三錢龍膽草五分水煎服

一感溼熱之氣復感風邪手足牽引肉瞶目脹低頭視下

肘膝相構人以爲陽明之傷寒也誰知之陽明之瘧症乎夫陽明胃土也風入於胃必變爲熱況原感熱氣則熱以濟熱宜至發汗亡陽何肉腠胸脹而不發狂手足牽引而不出汗反低頭視下無登高而呼之症肘膝相構無棄衣而走之病正以溼邪混之也蓋陽明之火最惡者燥耳今有溼氣在胃雖侮胃中之土亦益胃中之燥卽發汗而不至亡陽發狂之禍也若妄用風藥以散其表必至汗出而不可止仲景張夫子曾用大承氣湯以下其邪然而脾旺者尚不致損傷脾氣否則下之亡

陰恐有意外之虞也然則風溼熱既同入於胃中則治法不可不治胃而又不可傷胃也方用全陰救胃湯玄參五錢茯苓五錢桃仁一錢葛根一錢人參一錢麥冬五錢水煎服一劑病半痊二劑病全愈方中資胃中之陰而不損其胃中之氣玄參去熱葛根去風茯苓去濕三邪皆去而又得人參以生胃麥冬以生肺則桃仁不亦可以已乎不知桃仁最動之味三邪併入於胃中而補藥多於攻藥則邪得補而反流連不去加入桃仁性急之物補既不滯而攻亦不緩始能相濟以有成也

此症用二苓槐

膏湯亦妙

石膏猪苓槐米各三錢茯苓五錢防己五分黃芩一錢水煎服

一感溼熱之氣復感風邪發熱腹痛肌肉顫動四支堅急人以為太陰之傷寒也誰知是太陰之痙症乎太陰者脾經也脾土溼土也溼土何堪溼邪之再犯乎溼入於脾最難分消溼邪去而溼之根尙在一再感溼仍如前溼之病矣况加熱以發其炎蒸加風以生其波浪自然中州反亂而四境騷然堅急之勢成顫動之形兆倘用安土之品則土旺而水無泛濫之虞水乾而土無鬱勃

之氣風卽欲作祟而平成旣奏亦可以解慍矣無如世人動輒言下詎識下多亡陰無陰以灌注於五臟七腑胸腹手足何所資以爲養哉勢必堅急顫動有亡陰而死者矣方用安土散白朮一兩茯苓五錢車前子三錢薏仁五錢赤小豆一錢通草一錢柴胡五分石斛三錢水煎服此方以利水之藥爲君仍是健脾之藥蓋土旺自能制水況又有利之者乎此症原是溼邪之難治單去攻溼而風與熱邪自易吹散所謂攻邪必攻其堅也譬如大敵在前滿山遍野俱是賊黨倘止從偏旁掠陣

則賊且全營俱來死關反至敗衄不若竟攻中堅突圍
直入搗擒巨魁則餘氛不戰而自遁痙病之重治溼邪
亦正此意可借敵而作鑒也

此症用薏朮定

痙湯亦效

白朮一兩薏仁芡實各五錢柴胡知母
甘草天花粉各一錢神麴二錢水煎服

一感溼熱又且感風遂成癰瘰身蹠足彎不能俛仰人以
爲少陰之傷寒也誰知是少陰之痙病乎夫少陰者足
少陰腎也腎宜熱不宜寒宜濕不宜燥何以痙病有濕
有熱反成癰瘰蹠彎不能俛仰之症耶不知腎最惡風

而喜熱者喜真火之生非喜邪火之尅也喜真水之養
非喜邪水之傷也蓋邪火助燥邪水增溼耳既有二邪
入於腎中又益之以風安能無癰瘕踈彎不能俛仰之
苦哉然則治法仍須治溼熱少佐以祛風爲得也方用
助腎辟邪丹茯苓五錢薏仁五錢防已一錢薺蒼草一
錢玄參三錢水煎服此方用防已以治腎中之風用薏
仁茯苓以去腎中之溼川玄參薺蒼草以治腎中之熱
是風熱溼三者均治何病之不可去哉夫腎宜補而不
宜瀉今去風去溼去熱得非瀉腎之藥乎然而薏仁茯

苓雖利溼而不損其陰防已雖去風而不傷其氣玄參
稀莢雖去火而不滅其光非瀉腎而仍是補腎若單瀉
而不補則誤矣

此症用散瘕

湯亦佳

防已一錢白朮一兩澤瀉稀莢草炒
黑荊芥各二錢薏仁三錢水煎服

一感溼熱又感風邪厥逆下利舌卷囊縮背曲肩垂項似
拔腰似折手足俱冷其腹脹大人以爲厥陰之傷寒也
誰知是厥陰之瘕症乎夫風溼熱三合而成瘕邪傳入
厥陰乃入肝木之經也其勢更急世人誤發其汗必致

動溼溼雖陰類然是外受之陰邪非肝中之真血也所
動之陽奔入溼中爲溼所沒必至亡陽蓋脫出之陽不
啻如龍之出谷其體輕矯飛騰而不可止遏今爲溼所
滯留則如蛇行匍匐儘力奔越究難飛去故此等痙病
皆誤汗而成之也治法又不可拘於散邪仍須補正惟
救其亡陽而亟使其回陽耳雖然陽之所以亡者終由
於陰虛之不能攝陽故補陽必須補陰而補厥陰之陰
仍從少陰腎經以補之也方用回陰散痙湯巴戟天五
錢茯苓一兩山藥五錢防風五分炒梔子一錢白芍五

錢當歸三錢白朮一兩甘草一錢水煎服此方補肝經之血而佐之去溼去火去風之味自是正治之法而又補腎中之火益之巴戟天何居正補少陰之謂也第厥陰之木非少陰之水不生何必補腎中之火詎知汗發亡陽陽氣盡從外泄腎中已無真火單用寒涼以祛熱則脾胃不勝其寒矣巴戟天溫腎不至大熱腎溫而陽回肝清而陰足陰陽和合內之正氣既固風熱溼之外邪不必攻而自破況原有攻之者乎此有益無損之治法又何患厥陰痙症之無傳久哉

此症用黃白茵

陳湯亦效

白芍茯苓各一兩猪苓三錢茵陳一錢白朮
五錢甘草一錢黃連半夏各五分水煎服

小兒頭搖手勁眼目上視身體發顫或吐而不瀉或瀉而
不吐人以爲驚風之抽掣也誰知是風熱溼三者合之
以成痙乎小兒純陽原不宜虛然而多食瓜果溼留於
胃溼久則變熱熱極則生風此風起於內而不來於外
也人見小兒頭搖手勁等症毋論其虛實投以抱龍丸
不效改用牛黃丸又不效乃用金石腦麝香竄之藥以
開其竅而鎮其驚無不立亡嗟嗟驚風二字自創立以

來殺小兒者不啻數百萬矣並無有一醫闢其非者南
昌喻嘉言頗知其失大聲告誡無如傳世既久一時不
可轉移且嘉言有論無方世亦不識治法鐸聞師言甚
悉因暢論之而且傳其方也小兒之易於成瘕者因其
骨脆皮薄不耐風邪故邪一入腠理便入臟腑况其飲
食喜寒而不喜熱以致損傷脾胃而成吐瀉之症上吐
下瀉則陰陽兩虧平日所受之溼盡行越出溼出而熱
留臟腑之中無陰相養遂變成風象以惑人人亦卽爲
其所惑但治風而不治正所以十人十死也故見此等

之症斷不可祛風一作風治去生便遠蓋其身中實實
無風無風而妄用風藥以倍耗其損傷之氣安得不速
其死哉治法惟補其脾胃而止其吐瀉則十人十生也
方用救兒回生湯人參二錢白朮三錢茯苓一錢砂仁
三粒炒黑乾姜五分山查五粒蘿蔔子五分車前子一
錢厚朴三分神麴三分半夏五分水煎服此方以十歲
爲準五歲者減半一劑卽吐瀉止二劑卽抽掣定三劑
卽全愈此方補中有利調和於脾胃之內則陰陽有旣
濟之歡自然無變動之害矣或曰補之是矣少加去風

散熱之藥未爲不可夫熱當夏令或可少加黃連數分以解其暑若值冬令更當增入辛熱之品蓋小兒吐瀉之後熱必變寒况加時令之嚴寒乎斷不可用寒涼也至於風藥毋論四時俱不可亂增萬不得已少加柴胡二三分可也

此症用加味

六君湯

人參八分白朮三錢茯苓二錢甘草半夏各三分
陳皮黃連各二分神麴麥芽防風各五分水煎服

一小兒吐瀉之後口噤不出聲手脚攣急人以爲驚風之搐搦也誰知是脾胃寒虛之痙病乎小兒純陽先天腎

氣原自完固無如後天之斷喪也人生後天以脾胃爲主小兒喜餐生冷傷其後天而先天亦損自然變症紛紜吐瀉之後無津液以潤腸胃更有何氣以運動四支乎此手足彎急搖擗之所以現也脾胃虧損肝木必來相侮脾胃又苦無津液以供給肝木之取資則肝木大燥燥極生火火極生風又其常也肺金見肝木之尅脾胃也欲出其清肅之令制肝以報土母之仇無奈脾胃爲肝所傷則土弱而金不能強力難制肝反爲肝之所凌而肺金畏肝中之風火惟恐逼乾肺氣自顧不遑何

能救母故不敢出聲也然則治法可不急治肝以救脾胃之虧乎方用活兒湯白芍三錢茯苓五錢人參二錢白朮三錢梔子五分麥芽五分枳殼三分半夏五分甘草一分神麴五分水煎服一劑攣急搐搦之症止二劑口噤之聲出三劑全愈此方平肝之氣以扶其脾胃之土脾胃之氣生而肺氣自旺足以制肝何風火之不息哉或謂肺弱不能制肝自宜補肺不知用補肺之藥必用潤劑不又助脾胃之濕乎痙病正苦濕也方中用茯苓之多正去其濕而反可用濕乎故不若平肝以安肺

不可潤肺以害脾胃耳

此症用四君
湯亦可效

人參一錢茯苓二錢白朮三錢甘草肉
桂各二分神龜柴胡各三分水煎服

一小兒偶感風邪發熱身顫手背反張人以爲驚風之角
弓反張也誰知是痙病中之寒邪乎小兒氣血未旺不
耐傷寒壯熱故一時昏沈非因風而動驚也故治小兒
之傷寒斷不可與大人一例同治動用風藥以祛風蓋
因虛入風治其虛則風自外出况止犯寒而不犯風是
原無風也何可祛風哉倘輕施祛風之藥則風門大開

內既無風可散勢必損傷正氣致營衛無所蔽而腠理不密且勾引外風深入內藏遂成不可救之症矣治法補其正氣而少加散邪之味寒既易解臟腑不傷手到便可奏功方用護子湯人參一錢茯苓三錢白朮二錢柴胡五分桂枝二分水煎服一劑驚定不必再劑亦何方法之神乎蓋小兒初傷風寒必先從太陽而入今用桂枝柴胡兩解其太陽少陽之邪則邪不敢遁入於陽明况有人參以固其脾胃之氣則邪尤不敢入於中宮加入白朮以利腰膝茯苓以通膀胱則邪從外入者即

散卽無外邪而柴胡以舒肝氣桂枝以煖脾胃之土正
有利益又何損哉無如世不知此等治法妄捏驚風名
色輕施發散鎮墜之味以至殺兒無算醫工不悟而病
家未知皆委於天數而不責其悞誰知萬鬼啼號於夜
臺哉吾願世人盡消滅驚風二字名目庶幾小兒之福
乎

此症亦可用

救嬰丹

人參一錢茯苓三錢柴胡三分白芍二錢
神麴五分砂仁一粒炮姜三分水煎服

一婦人新產之後忽然手足牽搐口眼喎斜頭搖項強甚

則角弓反張人以爲產後驚風誰知是亡血過多而成
瘕乎產後舊血已虧新血未長血舍空虚風尤易入原
不必戶外之賊風也卽一舉一動風自内生覺兩腋之
閒陰寒逼人一不慎而風入之矣然風因虛而入補虛
而風卽能出也第補虛之法血亡不能速生而氣怯則
宜急補補氣則血尤易生血生而風不能存故血舍驅
風尚非正治矧純用鎮驚之藥耶方用救產止瘕湯人
參五錢當歸一兩川芎三錢荊芥炒黑一錢水煎服一
劑病輕二劑又輕三劑全愈此方卽佛手散之變大補

其氣血之虛加之人參則氣更旺矣氣旺而邪不敢敵
況有荊芥引血歸經之藥血既歸經而邪何能獨留况
荊芥原能祛邪而不損正氣故可兩用之以出奇耳倘
不補氣血惟事祛風則血舍更空風將直入是立殺其
婦矣可不慎哉

此症用活母

丹亦神效

當歸人參各一兩川芎五錢柴
胡三分肉桂一錢水煎服即愈

人有一時手足捧掣口眼歪張人以爲中風之症也誰知
是瘧病之驟發乎夫中風病身必顛覆口必吐痰瘧病

狀如中風而身必不顛覆口中喉內必無痰涎之出入
與水雞聲也蓋中風無風風從內起瘧病則風從外入
風自成威不必借重內痰之助所以但有牽掣歪張之
風象絕無洶湧秘塞之痰聲也若風自內起者火動生
風痰以助之也故中風無外邪瘧病無內邪也無外邪
者不可治風無內邪者不可不治風耳然而單治外而
不治內則外風雖去內風必生是以祛風必須補正也
方用補中益氣湯人參一錢白朮三錢黃芪三錢當歸
三錢柴胡三錢升麻四分陳皮一錢甘草一錢水煎服

一劑而牽掣定再劑而歪張止三劑不再發夫補中益氣湯補氣之藥非祛風之劑乃用之以治痙瘓之風反易奏功者何故乎蓋氣虛則風易入也補其氣則正旺足以祛邪方中用柴胡原能祛邪也少用之於補藥之中則能提氣以衛正多用之於補藥之中則能益氣以祛邪故用至三錢而風難再留矣何必更借重他藥散風之多事哉世人但知參歸芪朮之多用以補正絕不知柴胡多用於參歸芪朮之中尤易祛邪余所以持表而出之也

此症用九宮

湯亦神效

人參一兩巴戟天葳蕤各五錢半夏烏藥蒸
芩各一錢陳皮附子天麻各五分水煎服

汗症門

人有大病之後無過而遍身出汗日以爲常人以爲內熱發汗也誰知是陽氣之虛外泄而腠理不能自閉乎大病之後氣血大虧氣不能入於血之中血必至逼其氣於膚之外使肺金清肅之令行則氣雖欲越出於皮毛而腠理未疎何能外泄惟大病之後必先損其肺肺先無自主之權安能禁其氣之不固哉氣不固而汗乃氣之所化汗隨氣泄遍體出汗淋漓又無內邪之散有不散盡其真氣者乎似乎較亡陽之症相同然而亡陽之

症身喪於頃刻自汗之病不至遽殞於須臾其故何也
蓋亡陽之症乃熱邪驅之自汗之症乃陰虛促之也陽
病暴而陰病緩陽暴難於救援陰緩易於調劑治法自
當以補氣爲主而補氣之中兼以補陰則陰能攝陽汗
不止而自止矣方用攝陽湯人參一兩黃芪一兩白芍
五錢麥冬五錢北五味一錢山茱萸三錢熟地一兩水
煎服二劑汗少止四劑汗大止十劑全愈此方用參芪
以大補其氣氣足則肺氣有養皮毛自固益之麥冬五
味則肺金不持自足以衛外兼可以分潤於腎水猶恐

汗出太多必損耗真陰更加熟地山茱以益精使肺金不必又來下生腎水則肺氣旺而皮毛益固矣增入白芍一味以收斂肝氣則肝木自平使肺金無仇家之相逼則肺氣安然自能行其清肅之氣而下輸於膀胱則上下之氣舒而心中生液不來尅肺則肺金有權得以自主安肯聽汗之自出哉此攝陽之妙法也倘貧窮之人無力買參豈忍視死不救前方之中倍加黃芪二兩增入防風五分同前藥煎服功未嘗不同但必須多服數十劑也

此症用斂汗

湯甚妙

黃芪一兩麥冬五錢北五味

二錢桑葉十四片水煎服

人有夢遺之後身體狼狽加之行役太勞或行房太甚遂至盜汗淋漓人以爲腎氣之虛也誰知是心氣之熱乎夫心喜寒而不喜熱腎喜熱而不喜寒似乎心腎之相違然而於相違之中未常不相合也腎因夢遺之後自然精水不足加之行役行房以勞其筋骨則內陰大虧何能上濟於心乎心無腎水之濟則心添其熱而腎水更耗久則腎畏心之取資堅閉腎宮而心不得不仍返

於心宮無奈心無液養而煩躁之念生然心雖無寧靜之氣未常無專主之權徒然煩躁而相火尚不敢顯背夫心以自越出於軀壳之外但乘心假寐乃竊其資重而潛移耳故盜汗之出與自汗之出實有不同自汗者心不得而自主也盜汗者心尙能操其意此等之汗必出在胸間者尤甚汗本熱也而越出於軀壳之外則熱變爲寒正因相火之熱乃虛火而非實火况乘心之未知而遁出非明目張膽者可比熱出爲寒正顯其陰之象也况心原無液何從而得汗乎亦竊腎之餘津私自

潛移者也治法瀉心中之熱仍宜補腎中之水腎水足而心火自清心火寧而心汗自止矣方用防盜止汗湯麥冬五錢生棗仁一兩熟地一兩山茱萸三錢黃連五分人參三錢丹參三錢茯神三錢肉桂五分水煎服一劑汗少止二劑汗全愈此方心腎雙補之藥也心腎兩足自有離而復合之勢黃連清心肉桂溫腎二味同用能使心腎交於頃刻心腎既交則心火清明相火畏主何敢竊財用而偷出哉倘不補心腎惟事止汗汗不能止必且輕變重而重變危矣烏可輕用止澀之味乎

此症用四參

湯亦效

玄參一兩麥冬生地各五錢天門冬人參沙參各三錢丹參茯苓各二錢黃連五分北五味一錢水煎服人有夜間發熱初時出汗星星後則漸多日久每夜竟出大汗至五更而止人以爲陽虛盜汗也誰知是陰虛出汗乎夫陰虛者腎虛也腎藏真陰陰宜秘藏何故發汗蓋腎中之火動也腎水非火不養何反致洩水卽水洩宜從下出何走皮毛而旁出耶不知腎火生水真火也真火喜靜而不喜動水靜則真火生水水動則真火泄水矣生水則火能秘藏泄水則火乃奔越故腎中之火

動者仍腎中之水自動由於人之縱慾而好泄其精也
精泄過多則勞其精而水動而火亦動火動而水不足
以濟之則火且挾水而騰出於本宮不從下走而乃隨
其火性遊行於經絡腠理之間遇毛竅而泄也初則偶
爾遊行久則夜夜出汗陰氣愈虛則愈汗毛竅之細路
竟成轉輸之大道矣然汗旣易出宜無分晝夜何夜汗
而晝不汗耶得毋陰虛而陽未虛乎不知陰陽各有道
路行於陽之分則陰不敢奪陽之權行於陰之分則陽
不敢奪陰之柄夜間出汗實陰走於陰之途至於五更

則陰不敢入於陽之界故陰汗遇陽氣而自轉非陰虛而陽不虛也治法宜大補其真陰而加之陽分之藥提陰出於陽分庶幾陰遇陽而止也方用補陰止汗湯熟地一兩山茱萸五錢人參二錢白朮三錢地骨皮一兩沙參三錢北五味子一錢桑葉十片水煎服二劑汗少止四劑汗乃止十劑汗不再出矣此方熟地山茱補精之物也地骨沙參補陰而更能清骨髓中之虛熱五味桑葉止汗之神劑人參白朮健脾開胃補氣之聖藥也多用補陰之品則水足以制火少用補陽之味則陽易

於提陰陰陽水火既無偏勝之虞自無走泄之患何必
用澀精之壯蠟斂汗之瞿麥哉

此症用湛露

飲亦效

熟地二兩地骨皮沙參丹皮
各五錢北五味一錢水煎服

人有飲食之時頭項至面與頸頰之間大汗淋漓每飯皆
如此然身又無恙人以爲陽氣之旺也誰知是胃氣之
盛乎夫胃氣卽陽氣也胃旺則陽旺而分爲二者何故
不知陽旺者合三陽而言之胃旺者單舉胃一經而言
之也胃本屬土無水穀之入則胃氣安靜卽處飢餓之

時而其火暗起亦不過在胸膈間不能上至於頭項惟得水穀之氣填於陽明之經則胃中之火借水穀之氣以助其勢遂化汗而上騰越出於頭面之上下也此等之汗明是胃火之盛由於心包之火旺也心包生土以生火非助火以害土胃得火生以出汗不同於邪火之自焚也故止出汗於上焦而不亡陽於下焦耳治法瀉胃火之有餘不可損胃土之不足使胃平而汗自止也方用收汗丹玄參三錢生地三錢荆芥一錢五味子三分桑葉十片白芍五錢蘇子一錢白芥子一錢水煎服

服一月全愈此方不去瀉胃火反去滋陰蓋陽之盛者陰之衰也補陰則陰旺自足攝陽不必止汗而汗自止况方中有桑葉荊芥爲引經止汗之藥白芥蘇子爲消痰定氣之品原調劑之咸宜抑陽而歸陰化汗而爲精又何疑乎然必久服而始奏效者以調胃之藥宜和緩而不宜急遽也

此症用龜豕膏亦奇效

殺猪心內之血一兩龜板膏二兩五味子二錢爲末煮成一塊口含化嚥服作一次食完永不再發先將龜板融化後入猪心血再入五味子末調化膏切片含化神方也

人有心頭有汗一身手足無汗者人以爲心熱之故也誰知是思慮過多心虛而無血以養心乎夫心主火也思慮過多則心火炎燒逼乾其液液乾宜無汗矣何心頭多出汗耶不知此汗非汗也乃心中之液內不能存外走而汗出耳或疑心液無多安得盡化爲汗不知心爲君主之宮心熱則五臟七腑之液羣來相資因其內熱之甚不養心而爲液反越心而爲汗也汗旣多出無有盡期五臟七腑之液何能相繼勢必心愈熱而汗不可止及至汗不可止而心中乾燥煩躁不眠之症生矣治

法補血以養心瀉火以生液不必止汗而汗自止矣方
用滋心湯人參三錢桑葉十四片黃連五分丹參三錢
麥冬五錢甘草五分熟地一兩山茱萸五錢栢子仁二
錢生地五錢白朮三錢沙參二錢玄參三錢丹皮三錢
水煎服二劑心汗止十劑不再發此方名爲滋心實多
滋腎之味蓋心之液必得腎之精上漑而液乃生故欲
補心中之液必須補腎中之精也補腎而少加清心之
品則心火安寧而液不外越矣

此症用助思

湯亦效

人參五錢熟地一兩生地五錢麥冬五錢北五味一
錢黃連一錢肉桂三分茯苓二錢兔絲子二錢丹皮
二錢丹砂一錢不可經火梧子仁三
錢炒棗仁二錢蓮子心一錢水煎服

五癰門

一穀癰之症胸中易飢食則難飽多用飲食則發煩頭眩小便艱澀身如黃金之色此是胃中虛熱之故非胃中之溼熱也人身脾胃屬土脾陰土也而用則陽胃陽土也而用則陰脾胃和同則剛柔並濟通調水道易於分消惟七情傷損於內則陰陽不相和合胃無陰以和陽則熱聚而消穀脾無陽以和陰則寒聚而積水兩相搏激故昏眩煩悶生焉於是所食之水穀不變爲精華之清氣而反蒸爲腐敗之濁氣矣濁氣下降者也濁氣下

流於膀胱膀胱受胃之熱氣化不行小便閉塞水卽走於陰器而熱散走於皮膚故一身發黃也治法升胃中之清氣以分利其膀胱則清升而濁易降水利而熱易消方用分濁散茯苓一兩車前子三錢猪苓三錢茵陳一錢梔子三錢水煎服一劑水少利二劑溼乃退十劑全愈方中以茯苓爲君者利水而不傷胃氣胃氣不傷而後佐之去熱消溼之品則胃無火亢之憂自然脾無水鬱之害倘不早治而水溼之氣流入於腎則腎被其傷必至腹滿成蠱不可治矣

此症用茵陳苓朮湯亦效

茵陳三錢茯苓白朮薏仁各五錢知母一錢水煎服
一酒疸之症心中時時懊懣熱不能食嘗欲嘔吐胸腹作
滿然清言了了人以爲酒食作疸也然而酒溼之成疸
由於內傷飢飽勞役也夫人之善飲者由於膽氣之旺
也夫膽非容酒之物而能滲酒酒經膽氣之滲則酒化
爲水入於膀胱而下泄矣惟其內傷於飢飽勞役則五
臟受損臟損而腑亦損矣五臟六腑俱已受損寧膽氣
之獨旺乎膽氣旣衰則飲酒力不能滲無如人之縱飲
如故則酒多而滲亦多更傷膽氣膽損不能滲酒酒必

留於脾胃之間而脾胃不及從前之旺則酒肉不能受
傳之膀胱而膀胱又不及從前之健則水入不能消下
既不行必返而上吐而下洩又艱中州又不可久留於
是溼熱之氣蘊蔭衝膈懊懣而發於心由是遍漬周身
分佈四體盡發爲黃也夫心至懊懣其心神之昏亂可
知何又能清言了了耶不知酒氣薰蒸於一時則見懊
懣懊懣者欲痛不痛之狀非心中之神至於妄亂不寧
也治法宜解其酒之毒而兼壯其膽膽氣旺而酒氣自
消酒氣消而水氣自泄水氣泄而黃自解矣方用旺膽

消酒湯柞木枝三錢山梔子三錢桑白皮三錢白茯苓
三錢白芍藥一兩竹葉一百片澤瀉二錢水煎服二劑
而膀胱利四劑而黃色輕八劑全愈夫柞木專能消酒
毒於無形酒毒既消則拔本塞源矣至助膽之藥舍白
芍山梔無他味也其餘之藥不過分消溼熱之氣世不
知治法或吐或下皆操刀而殺之也可不慎哉

此症用郁李歸

芍湯亦效

白芍一兩當歸茯苓各五錢郁李仁五分
甘草三分黃連五分車前子二錢水煎服

一女勞之疸其症腎氣虛損四支痠痛夜夢驚恐精神困

倦飲食無味舉動乏力心腹脹滿脚膝痿緩房室不舉
股內溼癢水道澀痛時有餘瀝小腹滿身盡黃額上黑
人以爲黃疸之症誰知因女色而成者乎夫入室久戰
相火充其力也相火衰則不能久戰矣火衰而勉強入
房則泄精必多火隨水散熱變爲寒矣人身水火不可
少者也水衰則不能制火而火易動火衰則不能利水
而水易留顧水留宜可以制火矣然而所留之水乃外
水而非內水也內水可以制火而成液外水不能消火
而成痺故女勞之疸仍是溼熱而結於精竅之間非血

瘀而閉於骨髓之內也倘用抵當湯水蛭之類以峻攻其瘀血或用礬石散硝石之品以蕩滌其微陰則促之立亡矣治法宜補腎中之氣而不可有助火之失宜利膀胱之水而不可有亡陰之愆當緩以圖功不當責以近效也方用減黃丹治之白茯苓五錢山藥五錢人參三分白朮一錢芡實五錢薏仁五錢兔絲子三錢車前子一錢生棗仁一錢水煎服十劑黃疸減又十劑黃疸更減又十劑全愈再服三十劑可無性命之憂女勞疸最難治人生此病未有不死者苟存堅忍之心絕慾懷

疾信服前湯無不生者蓋此丹固本以救傷並不逐邪以瀉瘀腎氣日健而黃色日減矣或疑女勞之疸成於腎之無火似當補火不知疸雖成於無火今病久陰耗若補火則恐燥陰不特無益而反害之矣

此症用薤蒼杜

木湯亦效

白朮二兩杜仲五錢茯苓五錢車前子三錢薤蒼五錢山藥一兩水煎服

一肺疸之症鼻塞不通頭面俱黃口澹咽乾小水不利人以為黃疸之症誰知實由於肺氣之虛耶肺金氣旺則清肅之令下行於膀胱凡有溼熱盡從膀胱下泄則小

水大行何溼能存水既直瀉則熱亦難留惟其肺氣先
虛而後溼熱鬱蒸於胸膈之間致肺燥而失其清肅之
令水氣遂乘其燥而相入燥與溼合而成熱溼熱相留
欲分入膀胱而膀胱不受欲走於皮毛之竅而腠理未
疎不能越行於外遂變現黃色於皮膚也治法宜宣通
肺氣健其脾胃之土蓋因肺氣閉於上而後水氣塞於
下使肺氣上通則水且下降況重補其脾胃以生肺乎
此治肺疸必宜宣揚夫肺氣也方用揚肺利溼湯桔梗
三錢天花粉二錢白朮五錢茯苓五錢桑白皮三錢茵

陳三錢猪苓二錢黃芩五分水煎服一劑鼻塞通二劑
咽乾潤三劑口澹除四劑小水大利十劑頭面之黃盡
散矣此方開腠理而生津液則肺金有潤燥之功合之
茯苓茵陳花粉白朮則土氣大旺金氣亦揚清肅令行
而膀胱之壅熱立通小便利而黃色烏能獨存哉

此症亦可用
通氣飲

桔梗二錢紫苑二錢白朮五錢茯苓五錢甘草
三分茵陳一錢益智仁三粒貝母二錢水煎服

一心疸之症煩渴引飲一飲水卽停於心之下時作水聲
胸前時多汗出皮膚盡黃惟兩目獨白人以爲黃疸也

誰知是心中虛熱以成之乎夫心喜燥不喜溼然過於燥則未免易其性以喜溼矣然而心終宜燥而不宜溼以溼濟燥可權宜行於一時不可經常行於長久蓋水乃陰物陰居陽地不肯遽入於小腸心又因水制力不能分消移其水以入於膀胱故水停心下作聲而臘中乃心之相臣見水邪犯心且出其火以相救戰爭於胸間水得火炎而熱化爲汗時出於胸其餘之水何能盡解旁趨而出諸皮毛乃壅閉而變爲黃矣一身皆黃而兩目不變者蓋因肝開竅於目心爲肝子邪見肝本之

旺不敢犯肝之界兩目正肝之部位所以溼熱不至於
目而無黃色之侵耳然則治法宜補肝氣以生心瀉水
溼以逐熱則黃疸不攻而自散也方用瀉肝利溼湯白
芍一兩茯苓五錢白朮五錢茵陳三錢炒梔子三錢木
通一錢遠志一錢水煎服一劑症輕二劑又輕十劑全
愈此方補肝卽所以補心瀉水卽以瀉熱倘徒治黃而
不辨其臟氣之生尅妄用龍膽草等藥必至變爲寒黃
之症反難施治矣

此症用茵陳苓朮黃連湯亦效
茵陳三錢茯苓白朮各五錢黃連三錢水煎服

一肝疸之症兩目盡黃身體四肢亦現黃色但不如眼黃之甚氣逆手足發冷汗出不止然止在腰以上腰以下無汗人以爲黃疸也誰知是肝氣之鬱溼熱團結而不散乎夫肝屬木非水不長何以得溼而反鬱乎不知肝之所喜者腎水也非外來之邪水也腎水生木而發生邪水尅木而發癰蓋肝藏血而不藏水外來之水多則肝閉而不受於是移其水於脾胃然而外來之水原從脾胃來也脾胃之所棄而脾胃仍肯容之乎勢必移其水於膀胱而膀胱又不受蓋膀胱因肝木之溼熱不敢

導引而入以致自焚於是溼熱復返而入肝而肝無容
身之地乃鬱勃而發汗汗不能盡出而黃症生矣使汗
能盡出未必遽成黃也無奈肝之溼熱欲下走於腎宮
而腎氣惡肝木之犯杜絕而不許入境腰以下正腎之
部位也所以無汗而發黃耳治法開肝氣之鬱佐之分
溼散邪之劑則黃疸自愈矣方用利肝分水飲龍膽草
二錢茵陳三錢茯苓一兩猪苓三錢柴胡一錢車前子
三錢白蒺藜三錢甘菊花五錢水煎服二劑而目之黃
澹矣又服四劑身之黃亦澹矣再服四劑氣逆汗出之

病止又服十劑全愈此方開鬱於分溼之中補肝於散熱之內既善逐邪又能顧正兩得而無失矣

此症用利目

湯亦妙

龍膽草二錢茵陳三錢白芍一兩茯苓五錢澤瀉車前子白蒺藜各三錢柴胡一錢草決明二錢水煎服一脾疸之症身黃如秋葵之色汗沾衣服皆成黃色兼之涕唾亦黃不欲聞人言小便不利人以爲黃汗之病也誰知是脾陰之黃乎夫脾土喜溫黃病乃溼熱也熱宜非脾之所惡何故成黃不知脾雖不惡熱而畏溼脾乃溼土又加溼以濟溼脾中陽氣盡行消亡無陽則陰不

能化土成純陰之土何能制水哉水存於脾中寒土不能分消聽其流行於經絡皮膚矣凡臟腑之水皆下輸膀胱今脾成純陰則無陽氣達於膀胱矣然水寒宜清變黃色者何故蓋寒極似土也夫寒極宜見水象水寒宜見黑色不宜見黃而今變黃者以水居於土之中也其不欲聞人言者脾寒之極其心之寒可知心寒則膽怯聞人言則惕然驚矣故不願聞則治法宜大健其脾而溫其命門之氣佐之以利水之劑則陰可變陽黃病可愈矣方用補火散邪湯白朮三兩附子三錢人參二

兩茵陳三錢白茯苓一兩半夏三錢水煎服連服四劑而小便利再服四劑汗唾不黃矣此方白朮人參以補其脾茯苓茵陳以利其水附子以溫其火真火生而邪火自散元陽回而陰氣自消陰陽和協水火相制何黃病之不去哉

此症用茵陳分溼湯亦效

白朮二兩肉桂茵陳猪苓各三錢半夏一錢水煎服一腎疸之症身體面目俱黃小便不利不思飲食不得臥人亦以爲黃疸也誰知是腎寒之故乎夫腎本水宮然最不能容水凡水得腎之氣而皆化故腎與膀胱爲表

裏腎旺則膀胱亦旺然腎之所以旺者非腎水之旺而
腎火之旺也腎火旺而水流腎火衰而水積水積多則
成水腫之病水積少則成黃疸之病故黃疸易治而水
腫難治如腎疸之病不可治癰一治癰而黃疸反不能
痊必須補其腎中之火而佐之去溼健脾之藥則黃疸
可指日而愈也方用濟水湯白朮二兩肉桂三錢茯苓
一兩山藥一兩薏仁一兩茵陳一錢芡實五錢水煎服
二劑小水大利再用二劑飲食多矣再用二劑可以臥
矣再用二劑身體面目之黃盡去此方用白朮以健脾

也然而白朮能利腰臍之氣是健脾正所以健腎况茯苓山藥芡實之類俱是補腎之味又是利溼之劑得肉桂以生其命門之火則腎不寒而元陽之氣自能透化於膀胱况所用薏仁之類原是直走膀胱之品所謂離照當空而冰山雪海盡行消化何黃之不散哉或謂發黃俱是溼熱未聞溼寒而能變黃也嗟乎黃病有陰黃之症是脾寒亦能作黃豈腎寒獨不發黃耶况腎寒發黃又別有至理夫黃者土色也黃之極者卽變爲黑黑之未極者其色必先發黃腎疸之發黃卽變黑之兆也

黃至於黑則純陰無陽必至於死今幸身上發黃是內
已無陽陰逼其陽而外出尙有一線之陽在於皮膚欲
離而未離也故補其陽而離者可續耳倘皮膚已黑此
方雖佳何以救之哉

此症用加減五

苓散亦佳

白朮二兩茯苓一兩澤瀉三錢薏仁
三錢菰蔞草三錢肉桂三錢水煎服

人有心驚膽顫面目俱黃小水不利皮膚瘦削人以爲黃
疸之症誰知是膽怯而溼乘之乎夫膽屬少陽乃陽木
也木最喜水溼亦水也水溼入膽宜投其所喜何反成

黃疸之病蓋水多則木泛木之根不實矣少陽之木非大木可比曷禁汪洋之侵蝕乎此膽之所以怯也膽怯則水邪愈勝膽不能防水邪直入膽中而膽之汁反越出於膽之外而黃病成矣治法瀉水溼之邪則膽氣壯而木得其養又不盡然也木爲水浸久矣瀉水但能去水之勢不能固木之根木雖尅於土而實生於土故水瀉而土又不可不培也培其土而木氣始能養耳方用兩宜湯茯苓五錢白朮一兩薏仁五錢柴胡五分龍膽草一錢茵陳一錢郁李仁五分水煎服二劑輕四劑又

輕十劑全愈此方利溼無非利膽之氣利膽無非健脾之氣也脾土健土能尅水則狂瀾可障自然水歸膀胱盡從小便而出矣

此症用竹茹龍

膽湯亦效

白芍一兩龍膽草半夏各一錢茯苓五錢茵陳竹茹各二錢白朮三錢水煎服

人有小便點滴不能出小腹膨脹兩足浮腫一身發黃人以爲黃疸矣誰知是膀胱溼熱結而成瘕乎夫膀胱之經氣化則能出水無熱氣則膀胱閉而不行無清氣則膀胱亦閉而不行所以膀胱寒則水凍而不能化膀胱

熱則水沸而亦不能化黃痺之病無不成於溼熱是膀胱之黃痺乃熱病而非寒病也熱而閉結必解熱寒而閉結必祛寒第黃痺既成於溼熱宜解熱而不宜祛寒矣然而祛寒者必用熱藥以溫命門之火解熱者必用涼藥以益肺金之氣益肺氣寒則清肅之令下行於膀胱而膀胱不能閉結也方用清肺通水湯白朮一兩薤白一錢茯苓三錢半夏一錢麥冬三錢桑白皮三錢茵陳一錢澤瀉二錢車前子三錢黃芩二錢蘇子二錢水煎服一劑小便微利二劑小便大利四劑而黃痺之

症全消此方雖與揚肺利溼湯大同小異實有不同也
揚肺利溼湯提肺之氣也清肺通水湯清肺之氣也二
方皆有解溼之藥而利與通微有異利則小開其水道
而通則大啓其河路也

此症用通流

飲亦效

茯苓五錢白朮三錢桂枝五分茵陳
一錢木通車前子各二錢水煎服

大瀉門

人有飢渴思飲食飲食下腹便覺飽悶必大瀉後快或早或晚一晝夜數次以爲常面色黃瘦肢肉減削此非胃氣之虛乃脾氣之困也夫脾與胃宜分講也能消不能食者胃氣之虛由於心包之冷也能食不能消者脾氣之困由於命門之寒也今飢渴思飲食食後反飽飲後反悶是胃能納而脾不能受也但脾不能受何至大瀉後快蓋脾乃溼土旣無溫煖之氣又受水穀則溼以助溼惟恐久留以害土情願速傳之爲快譬如黃河之水

入於中州既無高山峻嶺以爲防又少深池大澤以爲
畜水過之處土鬆水泛易於冲决其波濤洄湧連泥帶
水一瀉千里不可止遏亦其勢然也日積月累非斷岍
之摧崩卽長堤之遷徙也脾正中州之土其大瀉之狀
正復相同治法不宜治胃而宜治脾不宜單治脾兼宜
治腎中之火方用奠土湯白朮一兩茯苓一兩砂仁五
分山藥一兩人參五錢蘿蔔子二錢附子三分半夏一
錢破故紙一錢水煎服此方白朮茯苓人參皆健脾之
聖藥附子破故紙助命門之神品山藥補腎之奇味砂

仁半夏醒脾之靈丹而蘿蔔子又分清濁之妙劑也一二服便能止瀉止不必多用然多用亦無妨碍自能回陽於既危生陰於將絕

此症用加味四

君湯亦效

人參小茴香各三錢白朮山藥各一兩肉桂一錢蘿蔔子一錢甘草一錢肉豆蔻一枚茯苓五錢水煎服人有長年作瀉五更時必痛瀉二三次重則五六次至日間又不作瀉人以爲脾胃之虛寒誰知是腎與命門之虛寒乎此等之病亦從脾胃虛寒而起乃久瀉亡陰脾傳入腎苟腎中之火不衰脾卽傳腎久之而腎仍傳於

脾而自愈惟其命門火衰不能蒸腐水穀脾遂傳水溼之氣於腎而不返矣五更乃亥子之時也其位在北正腎水主令之時水寒而火不能溫水乃大瀉此瀉卽內經所謂大瘕瀉也用止水之劑反不能止必須用補水之味使亡陰者速生尤須於補陰之中兼補其火則陽壯如能攝陰也方用填坎湯山茱萸一兩茯苓一兩巴戟天五錢肉桂三錢車前子三錢北五味三錢人參三錢芡實一兩白朮二兩水煎服一劑瀉輕再劑瀉又輕連服十劑斷不再瀉此方脾腎兼補又是分水止瀉之

藥則溼氣自解況得肉桂以溫命門之氣則膀胱易於化水寧復走大腸而作瀉哉

此症用五神

丹亦佳

熟地二兩山萸一兩五味子二錢破故紙肉桂各二錢水煎服

人有腹中大痛手不可按一時大瀉飲食下喉卽出完穀不化勢如奔馬不可止抑頃刻之間瀉數十次日一夜約至百次死亡呼吸此肝經風木挾邪而大瀉也其病得之夏日貪涼向風坐臥將暑熱之氣遏抑不宣藏于脾胃之內一過秋天涼風透入以尅肝木而肝木之

風鬱而不舒乃下尅脾胃而脾胃之熱遂與風戰將腹
中所有之水穀盡驅而直下必欲無留一絲以爲快故
腹中作痛其勢甚急脾胃欲止而風不肯止脾胃欲閉
而熱不可閉下焦之關門大開上焦之關門難闔所以
食甫下喉不及傳化而卽瀉也治法必須急救其脾胃
之氣而後因勢利導之然非多用藥餌星速補救則王
道遲遲鮮不立亡矣方用逆挽湯人參一兩茯苓二兩
大黃一兩黃連三錢梔子三錢甘草三錢水煎服一劑
腹痛除瀉亦頓止此方用人參以固其脾胃之氣則氣

不至於驟脫然最奇在用大黃也蓋此瀉乃火留於腸
一胃非用大黃迅逐則火不遽散水不盡流然徒用大黃
不用黃連梔子則火邪甚熾盤踞於斷澗曲溪未必驟
涸三味並用則大小河渠無不盡行啓洩然分消無法
則壅塞阻滯亦未可知益之茯苓以分清濁且是健脾
開胃之藥則土氣既堅自無冲決之患更慮過於迅逐
邪去雖速未免傷損腸陰又佐甘草之和緩以調劑於
遲速之間使人參易於生氣所謂剿撫並用無激而死
鬪之虞自然風浪息平水歸故道平成立奏也

此症用參連

湯亦效

人參茯苓各一兩白芍二兩黃

連三錢甘草一錢水煎服愈

人有口渴飲水忽然大瀉一日或十餘行或數十行晝夜之間瀉至數百次完穀不化直下無留人以爲火瀉也誰知是腎水不足以制火乎夫胃爲腎之關胃火必得腎水以相制腎水一虧胃火必旺而內火無資自索外水以相濟然外水只可少止上焦之炎不能竟助下焦之水故外水入而腎不受腎與膀胱爲表裏而膀胱亦不納水無從而化乃直趨於大腸而作瀉矣但胃火既

盛渴飲凉水宜變爲汗今不爲汗而作瀉者故因腎水不能制胃火之炎胃火必欺腎水之弱於是挾水以侮腎不泄汗而瀉水耳及其後也不特水之驟崩且火亦驟降關門不閉上下盡開不啻如崩湍倒峽建瓶而下也論其治法自宜急救其標然而徒止其瀉不急救其陰則亡陰立盡何以制火以存其胃氣乎方用生陰止瀉湯山茱萸二兩車前子一兩茯苓一兩白芍二兩肉桂三分白朮一兩甘草五錢山藥二兩薏仁一兩水煎服一劑瀉減再劑瀉又減三劑瀉全止矣此方純是補

腎補胃之藥非止瀉之劑也然而止瀉之妙已存於補
陰之中蓋陽火得陰而卽止也倘作胃虛有火治之亦
能止瀉然下多亡陰雖止瀉於一時而陰虛何能驟復
何若此方既能止瀉而陰陽兩不相傷之爲得哉

此症用存陰

湯亦效

熟地二兩 山藥茯苓各一兩 車前子五
錢 白朮二兩 甘草澤瀉各二錢 水煎服

人有終年飲酒不知禁忌逞醉入房適於泄精久則脾氣
大傷變成水瀉一感風寒遂大瀉不止如溏如積人以
爲酒濕損脾也誰知是酒濕傷腎乎夫脾乃濕上最惡

者濕也而酒又最濕幸酒性大熱而脾亦喜熱濕熱相合則脾不甚傷無如人借酒氣之熱以助其命門之火鼓動其焰以搏久戰之歡究之熱不可長恃精不能堅守興闐精泄火息而濕留於腎宮矣夫五臟六腑之水皆賴腎火以化之也而腎中有濕則火去濕存長年相伴歲月既深火日衰而濕日盛腎不能久留仍傳出於脾前酒之濕未去新酒之濕又來於是濕盛而熱亦盛脾不受熱之益專受濕之害故經年經月而作瀉也治法必須大補脾腎而後解其濕熱之毒方用解醒止瀉

湯白朮一兩山茱萸一兩茯苓一兩柞木五錢黃連三
五分白芍五錢附子一分水煎服此方脾腎雙補之藥
也用柞木黃連以解其酒毒用苓朮以消其水濕用芍
藥以斂其耗脫之陰用附子一分引羣藥入腎以掃蕩
其濕熱而非助其命門之虛陽也但此方必須多服爲
佳蓋酒濕之瀉甚難建功以濕熱入腎最不易出或十
服之後改湯劑爲丸朝夕服三月可以全愈矣

此症用黃柞
湯亦效

山茱萸一錢柞木枝肉桂五味子各二
錢山茱萸苓各一兩水煎服十劑愈

人有無端一時作瀉腹痛不可止面青唇黑幾不欲生肛
門之邊宛如刀割大瀉傾盆人以爲火瀉也誰知是受
毒而作瀉乎夫毒必有所由來非漫然而作瀉也或食
瓜果或飲涼水或斟隔宿之茶或吸露天之酒或遊神
廟陰寒之地或探古洞幽暗之方或貪臥於濕處或如
餐夫樹間或饕牛羊自死之物或吞禽鳥難化之肉皆
能受毒而發瀉雖毒受於腹中瀉出於腸外非必死之
症然腹疼欲死烏可無藥以救之耶救法於解毒之中
而輔之瀉毒之品因勢利導祛毒更神方用化毒神丹

生甘草五錢大黃一兩丹皮五錢當歸一兩雷丸三錢
蒲公英五錢水煎服一劑而所中之毒無不盡出而愈
不必二劑此方生甘草蒲公英以解毒合之大黃雷丸
則祛毒而無太剛之懼掃毒而無過滯之憂又得當歸
丹皮以助之但逐毒之穢而不損腸之陰非孟浪以用
之也

此症用雷轟
丹亦神效

雷丸紅花甘草各二錢白芍車前子
各五錢澤瀉猪苓各二錢水煎服

人有面黃體瘦善食易饑不食則痛日以為常一旦大瀉

連蟲而下如團如結血聚膜包人以爲蟲瀉也然蟲之
生也生於濕蟲之養也養於水穀也善食者蟲食則易
消易饑者蟲饑則易餓也不食則痛蟲無食以養則啮
人腸胃歲月旣久蟲以生蟲竟將腸胃之間變成巢穴
飲之食之而不肯散團結包裹何肯遽出哉且所用之
飲食供蟲而不足何能生津化液以養五臟七腑乎自
然臟腑之氣衰而胃氣亦漸弱矣胃弱則脾亦弱胃弱
則食必減而不能入脾弱則食難化而不能出久則胃
寒而脾亦寒脾胃寒冷則蟲苦無藏身之地偶將熱湯

熱水乘機下遁而大瀉一蟲既行衆蟲無止遏之勢成羣逐隊而下團結於膿血之內勢之所必至也治法乘蟲之遷徙而大下之則腸胃無留餘之蝕然而下之過甚必至損傷脾胃於攻之中用補則正氣得養蟲亦盡除兩益之道也方用掃蟲湯人參五錢白朮一兩大黃三錢白薇三錢百部三錢甘草一錢烏梅一箇水煎服一劑大瀉蟲盡出矣不必二劑服此藥後用四君子湯調理而安夫此湯雖曰掃蟲實補脾胃以生氣腹中生蟲至於如許之多其傷損脾胃者非一日矣似宜單補

而不用攻然蟲既大出不用攻蟲之藥惟用補劑則脾胃之氣回而蟲亦回矣反留爲後日之害故因其自出之時卽用祛蟲之藥蟲不敢貪補而流連也況攻之中仍有補劑但瀉蟲而不耗氣是攻補並用且善後得宜安得不收全功哉

此症用追蟲

丹亦神

甘草枳壳雷丸各一錢黃連百部檳榔各二錢人參史君子肉各三錢白朮五錢水煎服

人有臟腑不調久瀉不愈人以爲洞瀉也誰知是肝乘脾土濕氣下行之故乎夫肝屬木最能尅土然而土旺則

木不能尅木平則土不受尅惟肝木旣旺而土又過衰則木來尅土而土之濕氣難安矣人身之脾土易衰肝木復易旺肝木能旺非腎水生之而旺也大約得之怒與謀慮者居多大怒則肝葉開張過於謀慮不決則失於剛斷而躁妄之念生皆能使肝氣之旺旺則肝氣不能發泄必致乘脾脾乃濕土畏肝之尅氣不上升而下降遂致成瀉人之怒氣不常而謀慮無已肝亦烏能平而瀉又烏有止期乎治法平肝以瀉水則瀉可止也古人有用上涌之法而效者有用下泄之法而亦效者然

皆非善法也方用平瀉湯芍藥二兩茯苓一兩白朮二兩水煎服一劑肝氣平二劑洞瀉止三劑不再瀉矣此方用芍藥以平肝用白朮茯苓健脾以去濕肝氣既平不去刑土而脾得養無畏於木氣之尅况濕去則土燥無波可興何能作瀉奚必上涌以傷氣下泄以損陰用劫藥以制勝哉

此症用調脾

飲亦妙

白芍茯苓各五錢白朮一兩甘草一錢陳皮五分神麴二錢白豆蔻二粒水煎服

人有侵染鬼魅一旦大瀉此陰氣之侵傷於脾土也夫脾

屬太陰本是陰臟然陰中有陽則脾土運行易於變化
無復有過濕之虞是太陰濕土全藉腎中至陽之氣以
變化之也若鬼則至陰之氣也相接至久則至陽之氣
皆爲至陰所盜陰中無陽何以消化水穀况鬼氣又邪
氣也邪氣之盛由於正氣之衰正不敵邪則陰氣更勝
陰勝陽微泄何能止乎治法非補陽以去濕助正以消
陰則瀉正無底止也方用消陰止瀉丹蒼朮五錢白朮
一兩附子三分乾姜一錢山藥一兩水煎服連服十劑
不特瀉止精神亦健此方用蒼朮以祛邪用白朮以利

濕用姜附以生陽足矣何又入山藥補陰之多事也不
知人爲鬼魅所侵不惟陽氣消亡而陰精亦必暗耗加
入山藥之補陰者補真陰之精非補邪陰之水也况真
陽非真陰不生補其真陰正所以速生陽氣耳陽得陰
而姜附無太勝之虞反能助二木以生至陽之氣矧山
藥原是健脾利水之神物原非純陰無陽可比故同用
以出奇也

此症用逐魑

丹亦佳

蒼朮二兩 乾姜三錢 良姜二錢 茯苓一兩
甘草一錢 肉桂一錢 管仲三錢 水煎服

痢疾門

人有夏秋之間腹痛作瀉變爲痢疾宛如魚凍久則紅白相閒此是肝尅脾土也蓋夏秋之間寒熱必然相雜肝遇涼風則木氣不舒上不能宣必至下尅而脾胃之中受三夏暑熱欺肝木凋零乃與肝木相爭肝木激而成怒尅土更甚脾胃之土傷難容水穀遂腹痛而作瀉矣瀉久而糟粕已盡脾乃傳肝木之氣於腎而腎見其子之氣乃相助而作惡忘其自損母氣也紅白相閒者肝不藏血而紅見腎不藏精而白見也惟是肝內之血無

多腎中之精有限何以能綢繆不斷如水之傾如泉之湧也不知六腑畏肝木之橫五臟助腎之困交相成之也治法急平其肝氣之怒少佐祛穢之藥則肝氣不降而腎氣頓收不必止痢脾胃之土自安脾胃既安何懼痢之有方用平肝止痢湯白芍一兩當歸五錢梔子二錢枳壳一錢車前子二錢甘草一錢水煎服一劑痢輕再劑痢又輕三劑全愈此方全不去治痢但去平肝而痢自止蓋痢之來也始於肝痢之成也本於腎平肝則肝氣平肝平而腎氣亦平肝腎之氣平而脾胃烏有不

平者乎今人但去治脾胃也所以痢不能遽止耳

此症用和腹

湯亦可

白芍一兩當歸五錢枳壳三錢
廣木香二錢甘草一錢水煎服

人有夏秋之間先瀉後痢腹中疼痛後重之極不痢不可
欲痢不得口渴飲水小便艱澀小腸作脹人以爲火邪
之重也誰知是濕熱之盛乎蓋夏傷於熱必飲水過多
熱雖解於一時濕每留於腸胃迨至秋天寒風襲於皮
毛熱必秘於臟腑於是熱欲外泄而不能熱不得不與
濕相合然而濕與熱非好相識也相合相爭而疼痛生

矣熱欲下出濕欲相留彼此牽掣於大腸之間而後重
現矣熱欲出而不得出則熱必上焚不得不求救於水
然而濕留於下焦而火則忌水也使水不能傳入於膀
胱水火戰鬪仍從大腸而出此小腹之所以發脹耳治
法分解其濕熱俾濁者趨於大腸清者入於小腸不必
用澀藥以止痢也方用分解濕熱湯車前子一兩厚朴
三錢黃連一錢甘草一錢枳壳一錢檳榔一錢滑石末
三錢水煎服一劑後重除二劑疼脹止三劑口渴解痢
亦全愈此方用車前以利水用黃連以清熱用厚朴以

分清濁餘則止穢去滯調和於邪正之間以解紛爭也
君相佐使既用之攸宜安有不取效之捷哉

此症用二黃
湯亦神效

澤瀉二錢車前子五錢大黃檳榔滑石各
二錢黃連一錢甘草五分水煎服二劑愈

人有濕熱作痢大渴引飲飲後又不甚快心中懊懣小便
不利紅白相閒似膿非膿似血非血此是火熱未解之
故也夫濕熱之極始成痢疾但其中有濕輕熱重熱輕
濕重之分耳如此等之痢明是濕熱兩重之症單消水
則熱存而水難降單清火則濕在而火難除必須兩瀉

之熱與濕俱不能獨存也然而瀉熱必致傷陽瀉濕必致傷陰治法必於補陰之中佐以瀉熱濕之劑則陰既不虧陽亦無害夫瀉之既能損傷陰陽則補陰亦宜補陽矣何僅補其陰卽能不傷其陽也不知陰陽原兩相根也瀉熱之藥仍走於大腸之內雖損其陽仍損其陰也今補其陰則陰不傷矣何害於陽乎此補陰之所以不必再補陽耳方用滋陰止痢丹白芍一兩當歸一兩大黃三錢車前子五錢檳榔二錢蘿蔔子三錢水煎服一劑膿血減二劑懊懷除三劑口渴解而痢亦頓止矣

此方奇在大黃與蘿蔔子並用逐瘀穢實神分清濁甚速用之於白芍當歸之內補以行攻有攻之益無攻之失也

此症用通快
飲亦佳

黃連茯苓各三錢白芍一兩黃芩車
前子枳壳各二錢厚朴一錢水煎服

人有濕熱之極腹痛作痢上吐不食下痢不止至勺水難
飲胃中悶亂人以為噤口之痢也誰知是胃中濕熱之
毒乎夫痢宜下行下利宜也何以上吐而不能入乎此
蓋胃中之火得濕而蘊結不宣一旦作痢本欲下行乃

投之以飲食則火反上熾而不降以致胃口閉塞而成噤口也然而胃火之盛者由於心火之旺心火最惡濕一得濕則火鬱而不通則停住於胃口胃中之火愈增其薰蒸之氣二火相合則熱之勢固結而不散濕亦停住於腸胃之內胃中交戰安得不悶亂乎治法必須開鬱火之門而門不能易開必須引火開門之爲捷耳方用引胃湯人參一錢黃連三錢吳茱萸三分菖蒲三分各爲細末滾水調入於茯苓末中大約茯苓須用五錢一匙一匙調如稀餠者嚥之初時嚥下必吐吐後仍嚥

藥一受則不吐矣卽將前藥服完上下俱開門矣然後
用靖亂湯白芍一兩車前子五錢黃連一錢甘草一錢
枳壳一錢木通一錢廣木香五分茯苓三錢水煎服二
劑痢止不必三服也前用引胃湯者以心火喜燥黃連
雖寒然其性正燥也以燥投燥原非所惡况吳茱萸性
熱而燥以火入火同性豈有杆格之虞况入之人參菖
蒲之中乎蓋胃中之火乃邪火而心中之火實正火也
居於邪正之間非得正人君子之藥則邪不能散於頃
刻非得導引之使則心火不能返於故宮况胃氣之閉

正胃氣之虛也人參補胃氣之聖藥胃虛逢補不啻如
饑者之得食關一開而良將勇士奪門而入邪自驚走
矣後用靖亂湯者譬如以計奪門若後無大兵相繼則
敵且欺寡不敵衆未必不狹巷而戰死鬪而不肯遁今
又以利水逐穢平肝之藥濟之是前鋒旣勇於斬關而
後隊又善於蕩寇安得不成功哉

此症用啓關

散亦效

黃連人參茯苓各二錢木香三分吳
茱萸五分水煎服緩飲之隨飲卽愈

人有濕熱作痢數日之後腹不疼痛如膿如血陣陣自下

手足厥冷元氣欲絕此是火變爲寒而陰絕也夫痢無止法古人之語也然痢實不同有初起卽宜止者有日久而不可止者未可執痢無止法一語竟不用止也然不止痢不過久病之難痊若止痢每至變生於不測是痢又不可輕言止也此等之症正不可不止者蓋腹中作痛爲邪腹旣不痛何邪之有腹不痛而膿血陣陣自下乃氣脫而欲崩也手足厥冷乃氣脫而不能運也必須看其舌之滑燥何如耳熱極則舌必燥寒極則舌必滑也熱變爲寒其舌必滑須先止其痢以救脫不可瀉

其痢以攻邪矣方用止脫救痢湯人參二兩白朮二兩
白芍一兩肉桂三錢茯苓一兩甘草二錢赤石脂末三
錢水煎服一劑手足溫二劑膿血止三劑痢全愈減各
藥一半去赤石脂再服十劑元氣如故矣此等之痢世
不常有不可執此方以治痢余論症不敢不備質於天
師以存此治法救萬人中之一人也

此症用加味四
君湯亦效

人參白朮各二兩肉桂三錢北五味
子三錢茯苓一兩甘草三錢水煎服

人有受暑濕之毒水穀傾囊而出一晝夜七八十行膿血

稠黏大渴引水百杯不止人以爲腸胃爲熱毒所攻也
誰知是膀胱熱結而氣不化乎夫水濕之邪從膀胱而
出乃上由於肺氣之清肅下行膀胱奉之而能化也今
胃受暑熱之毒蒸薰於肺肺不能受乃移其熱於大腸
而大腸奔迫必鬱結於膀胱矣膀胱熱結則氣不化而
小溲短赤邪熱邪濕盡趨於大腸而出不啻如決水轉
石之驟猛也治法必須清膀胱之熱以迅利其小便但
肺與大腸爲表裏肺熱而大腸始熱故不若先清肺經
之熱也方用清源止痢湯黃芩三錢茯苓五錢紫參三

錢訶黎勒三錢甘草一錢天花粉三錢地榆三錢水煎服一劑減半三劑痢止此方清肺金化源之方也用黃芩地榆以涼肺卽所以涼大腸之熱也紫參療腸胃之熱能消積聚而通大小之便訶黎勒能固腸脫合而用之於茯苓甘草諸藥之內則通中有塞而塞中又有調和之妙所以奏功特神也

此症用迅行湯亦神

王不留行茯苓猪苓黃芩各三錢白朮三錢水煎服

人有下痢純血色如陳腐屋漏之狀肛門大開不能收閉

面色反覺紅潤唇似硃塗人以爲痢疾之死症也然治之得法尚可獲生以其症雖見死象而氣猶未絕有可續之機也凡下痢純紅開手卽宜用補陰之藥因人執痢無補法以至如此不知痢症何常不可補也用補陽之藥以治痢則有宜有不宜用補陰之藥以治痢則實無不宜也若一見紅白不問虛與不虛動用攻邪逐穢之劑以致白變紅紅變陳腐屋漏之色也夫下痢純血原是陽旺陰虛之症不補陰以制陽反助陽以攻陰則陰氣愈虛虛極則陰氣但有降無升矣肛門大開不能

收閉正有降無升之明驗也面色紅潤脣如硃塗正陽
在上而陰沈下之顯徵也陽宜降而反升陰宜升而反
降則陰陽不交不死何待乎然能奄奄不死者以其陰
氣雖降而未絕也治法急救其陰以引其陽氣之下降
兼補其陽以提其陰氣之上升未必非死裏求生之法
也方用補陰升提湯人參一兩熟地一兩白芍三兩茯
苓一兩升麻二錢甘草一錢山藥一兩北五味子三錢
山茱萸一兩訶黎勒三錢水煎服一劑痢減半再劑痢
止倘服之仍如前之痢也則陰已絕而陽不能交不必

再服論此方乃救陰之奇方提氣之聖藥苟有陰氣未絕未有不可續之而升提者也正不可因一用之無功竟置此方於不用如一見純紅之症急以此方減半投之何至有死亡之嗟哉

此症用續絕

湯甚佳

人參五錢熟地山茱萸山藥芡實各一兩甘草一錢北五味二錢水煎服

人有貪酒好飲久經歲月濕熱所積變成痢疾雖無崩奔之狀而有溏鷺之苦終年累月而不愈人以爲酒積之在脾也誰知是腎泄之病乃濕熱之酒氣薰之也氣薰

於腎之中腎卽醉於酒之味正不必其濕熱之盡入之也然而濕熱之侵由於腎衰之故腎不能敵乃移其濕熱於脾脾又久受濕熱之困不能再藏乃釀成酒積而作痢矣雖其積在脾病實在腎但治脾而痢不能愈必須治腎然徒治其腎病亦不能愈必須解酒之毒分消其濕熱之氣則不治痢而痢自止方用化酒止痢湯人參三錢白朮一兩山茱萸五錢黃連一錢茯苓五錢枳木枝五錢白芍五錢檳榔五分薏仁五錢水煎服連服四劑痢疾自愈不可多服愈後仍須忌酒否則暫止而

仍發也論此方實解酒毒然力止能解於目前不能解於日後非藥之過也蓋酒氣薰蒸於腎受毒最深用此方以解酒毒則脾胃有更甦之氣倘不遵酒戒仍然酣飲則酒入於脾胃其尅伐之性較前更甚蓋已傷而不可再傷也此酒積之病酒徒每每坐困不得享長年之樂可不慎哉

此症用萸朮杜

枳湯亦佳

山茱萸白朮各一兩枳木枝杜

仲各一錢水煎服十劑可愈

人有長年累月裏急後重而作痢者乍作乍止無有休歇

人以爲休息之痢誰知是正氣已復而邪氣尚存之故
哉夫痢不可妄止必須因勢利導之苟邪火邪水未曾
滌盡一旦用補塞之藥遽止之則痢雖遏於旦夕邪在
腹中時動時靜靜則安動則發亦其常也况益之厚味
之貪饕勞役之妄作安得不成休息之痢乎治法必宜
以利爲主利小便不若利大便也蓋正氣已復膀胱之
氣必能氣化以分水何必再利其小便邪之不盡者火
留於大腸也利大腸則邪且盡下然而利大腸之藥必
先從胃而入脾由脾而入大腸吾恐湯劑之入大腸不

遠受益胃與脾先受其損矣方用盡穢升大黃一錢滑
石一錢厚朴一錢地榆二錢檳榔一錢各爲細末用蜜
煮老爲丸一次服盡服後卽用膳以壓之不使留於胃
中必得微利爲度一利而痢病頓除此方專下大腸之
濕熱也邪原在大腸所以一用奏功倘畏損傷脾胃用
人參湯送下更妙然亦止宜於虛弱之人不宜於健旺
之客也

此症用緩攻

湯亦神

白芍一兩枳殼五分大黃一錢
檳榔五分水煎服一劑卽止

人有中氣不順口中作噯下痢不止人以爲濕熱作痢誰知是氣逆作痢乎夫痢疾多是濕熱然濕熱之所以停積於腹中者氣阻之也凡人大便氣閉則結氣逆則瀉有濕熱而更兼氣逆徒用消濕瀉熱之藥不用理氣之味則過於下行氣必更滯矣治法必須利氣佐之消濕瀉熱之劑爲妙雖然氣之所以逆者以下多亡陰陰血虧損氣乃不順遂因之作逆也欲氣逆而仍反爲順必須補陰以生血然而血不可以遽生陰不可以驟長用順氣之藥加入於補陰補血之中則陰血漸生痢可速

止矣方用葦撥散葦撥三錢芍藥五錢當歸五錢牛乳
半斤同煎一半空腹頓服一劑痢止再劑不再痢也葢
葦撥最能順氣且去積滯更神入之於歸芍之中更能
生長陰血佐之牛乳者牛乳屬陰乳乃血類無形之陰
血不能遽長用有形之陰血以滑其腸中之迫急則血
既無傷陰又不損轉能佐氣以去其結滯故奏功甚捷
取效獨奇耳

此症用順氣

湯亦效

廣木香三錢烏藥甘草枳壳各一錢白
芍五錢炒梔子車前子各三錢水煎服

人有腸澼下血另作一派噴啣而出且有力而射遠四散如篩腹中大痛人以爲陽明氣沖熱毒所作也誰知是氣血下陷之極乎夫清氣上升則濁物自降惟清陽之氣旣不能上升則濁陰之物必留滯於腸中而不化况助之濕熱之毒則血不能藏乃下注而噴射矣或疑血不上藏洞瀉宜矣何下出如篩乎此乃濕熱之毒氣火盛逞其威作其勢也至於另作一派啣血遠射者邪與正不兩立正氣化食而邪氣化血正氣旣虛不敢與邪氣相戰聽邪氣之化血不與邪氣同行以化食邪氣遂

驅腸中之血以自行腸中之食既不得出乃居腹而作
痛邪氣奪門而出是以另行作一派遠射有力也治法
升其陽氣瀉其濕熱之毒則正氣盛而邪自衰邪衰而
血亦不下也方用升和湯陳皮五分熟地五錢當歸三
錢生地二錢丹皮一錢升麻一錢甘草五分黃芪三錢
白芍五錢車前子三錢黃芩一錢水煎服二劑血止再
二劑全愈此方名爲升陽其實補陰但升陽而不補陰
則陽氣愈陷以陽氣之升升於陰氣之充也蓋下血既
久其陰必亡惟用當芍二地以補陰而後益之黃芪之

補氣則氣自升舉卽不用升麻之提而陽已有躍躍欲舉之勢矧助升麻又加車前之去濕丹皮黃芩之散火則濕熱兩消何氣之再陷乎此升陽全在和之之妙也

此症升陷

湯亦神

人參當歸各五錢熟地白芍各一兩丹皮荆芥車前子各三錢甘草黃連各五分水煎服

人有痢久不止日夜數十行下如清涕內有紫黑血絲食漸減少脈沈細弦促人以爲濕熱之毒未除誰知是瘀血未散乎夫痢成於濕熱未聞痢成於瘀血也不知血喜流行若不流行且化瘀矣况因內外之傷以成瘀欲

其不化爲痢難矣世人不知成瘕之故試舉其一二言之如飽食之後復加疾走或飲酒之餘更多叫號或毆傷忍痛或跌磕耐疼或大怒而氣無可泄或遇鬱而愁無可解或餐燔炙之太多或受訶責之非分皆能致瘕而成痢也及致成痢以治痢之藥投之絕無一驗者以所成之痢乃似痢而非痢也治法但治其瘕不治其痢則得耳方用消瘕神丹乳香一錢沒藥一錢桃仁十四箇滑石三錢廣木香一錢檳榔一錢白芍五錢神麴飴爲丸米飲下百丸連服二日卽下穢物而愈倘二日少

瘥不全愈者此瘕盛也用大黃一錢煎湯送前丸二百丸無不愈矣此方治瘕而痢未常不兼治也凡治痢久不愈者可用此丸以下其瘕血要在人消息之也

此症用分瘕

湯亦神

大黃軍前子各三錢丹皮五錢當歸一兩枳殼柴胡各一錢水煎服

癥瘕門

人有肝氣甚鬱結成氣塊在左脅之下左腹之上動則痛靜則寧歲月既久日漸壯大面色黃稿吞酸吐痰時無休歇人以爲痞塊也誰知木鬱而成癥瘕乎夫肝木之性最喜飛揚不喜閉滯肝氣一鬱必下尅脾胃脾胃受尅則氣不能暢行於臟腑遇肝之部位必致阻滯而不行日積月累無形化爲有形非血積而成瘕必食積爲癥也治法舒其肝中之鬱助其脾胃之氣則有形仍化爲無形矣倘見有形誤認爲食與血妄用消食敗血之

劑則脾胃之氣大傷而肝之鬱仍不能解勢必其形愈大往往有致死不悟者不重可悲乎方用平肝消痰湯治之白芍一兩當歸五錢白朮一兩柴胡一錢鼈甲三錢神麴一錢山查一錢枳殼一錢半夏一錢水煎服四劑礪小又用四劑而礪又小十劑礪全消矣此方全去平肝以解鬱鬱氣一舒不來尅脾胃之土則土氣自安加白朮以健脾開胃則脾胃氣旺不畏肝氣之尅則氣自通肝何阻滯之有况用鼈甲山查皆是攻堅去穢之神藥何至有鬱悶不舒哉

此症用化痞膏

外治亦可

大黃五錢人參三錢白朮五錢枳實三錢丹皮二錢
鼈甲一兩神麴一兩山查五錢麥芽五錢厚朴三錢
當歸一兩白芍一兩史君子肉三錢兩頭尖二錢蒲
公英一兩金銀花一兩生甘草二錢檳榔二錢防風
一錢川烏一箇香油三斤鍋熬以上藥煎數沸用白
布將藥渣灑出再煎油滴水成珠然後再入後藥末
薄荷葉二錢乳香沒藥各五錢麝香一錢赤石脂二
兩冰片二錢阿魏三錢血竭三錢各爲末入油內再
煎又入炒過木飛過黃丹末一斤收之成膏矣貼
痞塊止消一箇卽消其膏藥須攤得厚不可大也

人有脾氣虛寒又食寒物結於小腹之間久不能消遂成
硬塊已而能動人以爲癥結而生瘕也誰知是命門火
衰不能化物乎夫脾乃濕土必藉命門之火薰蒸倘命

門火衰則釜底無薪何以蒸腐水穀哉譬如陽和之地有太陽之照則萬物發育處於陰寒幽冷之區則草木萎稿安得有萌芽之達耶又譬如淤泥濕田非遇烈日炎氛未易爍乾是土必得火而燥也人身脾土何獨不然無火則所用之飲食停積於中而癥瘕生焉若用攻逐之法則虧損脾陰勢所不免何若仍補命門之火扶助脾土則旺土自能消化不必攻逐而癥瘕自開更覺漸移默奪之爲勝哉方用溫土消瘕湯白朮一兩茯苓一兩肉桂二錢枳實二錢人參五錢巴戟天五錢山萸

一錢水煎服二劑塊少減又二劑塊又減十劑消化於
烏有矣此方用巴戟天肉桂溫補命門之火火旺則陰
霾自滅人參白朮茯苓健脾又能利濕濕去而土燥溫
和寒蟲水怪何所潛形況有枳實山查之類原能攻逐
乎此方殆治其源而又治其標者也

此症亦可用化
塊丹治之

人參五錢白朮二兩肉桂神麴各
二錢葶薺一兩鼈甲三錢水煎服

人有胃氣虛弱食不能消偶食堅硬之物存於胃中久則
變爲有形之物腹中亂動動時疼不可忍得食則解後

則漸大雖有飲食亦痛人以爲痞塊成鼈也誰知似鼈
非鼈乎蓋痛之時以手按之宛如鼈身之背四足之齊
動也夫鼈動物也豈肯久安於一處其非鼈也明甚何
形之宛似乎蓋胃屬土土中所生之物大約四足者居
多土中所生之物喜靜而不喜動故安土重遷形如鼈
而不移也但旣不喜動何以亂動蓋性雖喜靜而覓食
充饑則動靜之物相同試看其得食則減而不亂動非
索食之驗乎日用飲食以供其口腹則身形日大身形
旣大所用之飲食何足以供之自然嚙皮傷肉安得不

痛哉治法自當以殺蟲爲主然殺蟲猶攻邪也攻邪必傷正氣補正以殺蟲又何疑乎方用攻補兩益湯樞子十箇白微三錢雷丸三錢神麴三錢檳榔二錢史君子十箇白朮一兩人參五錢水煎服一劑腹必大痛斷不可飲之茶水堅忍半日如渴再飲二煎藥汁少頃必將蟲穢之物盡下而愈不必二劑此方神奇方中盡是殺蟲之味用之於人參白朮之中且以二味爲君主之藥蓋冲鋒破陣之帥必得仁聖之君智謀之相籌畫於尊俎之間始能奏凱成功耳倘舍人參白朮不用徒用殺

蟲之味亦未必無功然斬殺過傷自損亦甚非十全之師也

此症用化龍

湯亦效

人參三錢白朮五錢白微百部各三錢麝香枳
壳各一錢檳榔二錢鰻魚骨炒黑爲末煎汁服

人有氣虛下陷飲食停住於脾胃之間而成塊者久則其
形漸大悠悠忽忽似痛不痛似動不動人以爲痞塊也
誰知是陽氣不升之故乎夫脾胃之氣日動宜升不可
朝下陷倘饑飽勞役以傷其形房幃秘戲以傷其骨
加之厚味醇醪不節口腹則脾胃之氣何能升哉於是

陽閉於陰之中陰離於陽之內陰陽兩不交接飲食不
易消化矣卽能消化而氣結不伸亦能成形但其形外
大而內歉按之如空虛之狀見假象以惑人也治法不
必治塊惟升提陽氣則脾胃無下陷之虛氣塊不消而
自化矣方用補中益氣湯人參三錢黃芪一兩當歸三
錢陳皮一錢甘草一錢白朮一兩柴胡一錢升麻四分
半夏一錢水煎服補中益氣湯乃提陽氣之聖藥也此
病原是氣虛故用黃芪補氣爲君用白朮一兩者以塊
結於腹取其利胷臍以通上下之氣參歸助芪朮以健

脾胃之土土氣既旺用升柴提之則氣尤易升癥瘕之塊未必無痰涎之壅加半夏入於陳皮甘草之中則消痰而又不耗氣同羣共濟發揚陽氣之升卽有邪結無不散矣况原係氣塊而非食塊有不立時消化者哉多亦不過數劑便可奏功也

此症亦可用加減

六君子湯治之

人參三錢白朮茯苓各五錢甘草山查麥芽厚朴各一錢陳皮枳殼各五分神麴一錢水煎服

人有正值飲食之時忽遇可驚之事遂停滯不化久成癥瘕者醫有作痞塊治之不效用補藥治之亦不效蓋驚

氣之未收也夫少陽膽氣主發生者也一遇驚則其氣鬱結不伸膽與肝爲表裏膽病而肝亦病必加怒於脾胃之土脾胃畏木氣之旺不能消化糟粕於是木土之氣兩停於腸胃之間遂成癥瘕而不可解也治法必須開少陽之鬱爲先佐之平肝之劑則脾胃不畏肝膽之尅自能分消水穀何至癥瘕之不散哉方用逍遙散治之白朮二錢白芍五錢當歸三錢柴胡二錢陳皮一錢半夏一錢龍甲三錢甘草五分茯苓三錢水煎服一劑輕二劑又輕十劑全愈逍遙散乃解鬱之神藥也肝膽

二經之鬱結開則脾胃之癥瘕不攻自破矣

此症用消瘕

湯亦神效

白芍一兩白木鼈甲各五錢甘草鬱金各一錢枳壳
五分天花粉丹皮香附各二錢茯苓巴戟各三錢白
豆蔻二粒廣木
香五分水煎服

人有偶食難化之物忽又聞驚駭之事則氣結不散食亦
難消因而痰裹成瘕人以爲痞也誰知是驚氣之閉結
乎夫驚則氣下疑有食必隨氣而下矣胡爲因驚反多
留滯耶不知氣乃無形食乃有形也無形之氣隨驚而
下降有形之物隨驚而上升且驚則氣下於肝中而不

下於脾中也氣下於肝則肝之氣不散而下尅脾土卽無物相閒尚留物不化况原有難化之物受於未驚之前安得卽化乎此癥瘕所以生也治法必去驚駭之氣大培脾胃之土則癥瘕不攻自散也方用培土化癥湯白朮一兩柴胡一錢茯苓三錢山藥四錢神麴二錢山查一錢枳壳五分兩頭尖三錢厚朴一錢鼈甲一錢五分白微一錢何首烏生用二錢白芍五錢白芥子二錢水煎服十劑癥瘕消半再服十劑全消此方用白朮以培土何又用白芍以平肝蓋脾弱由於肝膽之相制用

白芍以平肝膽正所以培脾胃之土也肝既不尅脾胃之土則土氣升騰無物不化況益之消癥破癥之味何塊之不除哉且方中柴胡一味已抒肝膽之氣膽氣揚而肝氣快總有驚駭不知消歸何處寧患癥瘕之固結哉

此症亦可用消
癥湯治之

人有飽食卽睡於風露之間睡未覺腹中飽悶不舒後遂成痞人以爲食未消而成痞也誰知風露之邪褻痰於胃中乎夫風邪陽邪也露邪陰邪也二邪合而不陰不

陽之氣最難化物故往往停積腹中而不散治法通其陰陽使陽邪入於陰之中陰邪出於陽之外則陰陽正氣兩不相損庶痰氣開而邪易遁也第陽邪易散而陰邪難散然雖有陰陽之分而祛邪何論陰陽但補其陰陽之正氣則邪不祛而自祛矣方用兩祛丹白朮一兩人參三錢何首烏生用三錢鼈甲末三錢地栗粉三錢神麴二錢茯苓二錢當歸三錢半夏一錢貝母一錢水煎服二劑輕四劑又輕十劑痞塊全消此方脾胃雙治之法也脾胃俱屬陰奈何置陽不問乎不知陽邪入於

陰分已全乎爲陰矣全乎爲陰是忘其爲陽也故治陰而不必治陽然方中雖是治陰未常非治陽之藥所以能入於陰之中又能出乎陰之外而陰邪陽邪兩有以消之也

人有食蔬菜之類覺胃膈有礙遂疑有蟲因而作痞人以爲蟲子之作崇也誰知是心疑而物不化乎夫脾胃主化物者也母論蔬菜入胃俱化卽蟲子之類到胃入脾安有不化者乎蟲卽消化何能成痞蓋疑心害之也夫脾胃之所以能化物者全藉乎先後天之火氣也後天

火氣在心包先天火氣在命門心包之火生胃命門之火生脾脾胃有二經火氣而後能化糟粕而出精微土得火而生也食蔬菜而動疑則心動矣心包代心出治主動而不主靜今心動而心包反不敢動心包不代心君以出治則火氣不入於胃胃既不能化物而脾遂不爲胃以運行其所食之物又安能化自然停住於腹而成痞矣若不解其疑止去健脾消痞則癥瘕寧易蕩除哉方用釋疑湯人參三錢巴戟天五錢茯苓三錢白朮五錢白微二錢甘草一錢史君子三枚砂仁三粒肉桂

一錢廣木香三分菖蒲五分水煎服三劑輕四劑又輕
十劑全消此方全去溫補心包之氣心包氣旺則心包
之火自必升騰寧肯自安於無爲而不代心君以宣化
哉心包火氣宣於胃中而命門之火翕然相從不啻如
夫婦同心內外合力齊心攻擊雖有癥瘕不立時消化
吾不信也

此症亦可用加味

四君湯治之

人參遠志山藥各三錢白朮五錢甘草枳殼各一錢
茯苓五錢菖蒲一錢山查二十粒神麴一錢水煎服